

կամ Հիւրեկայ վանք»-ը²⁵, որի «հանդեպ» Բաֆֆին հիշատակում է «մի այլ ամրոց»²⁶, Տեղագիրների նկարագրած այս տեղանքի նույնությունը «Հերքան-բերդ»-ի գտնվելու վայրի հետ բավականին հավանական է թվում ոչ միայն տեղանունների արտաքին նմանություն պատճառով²⁷, որը կարող է և խաբուսիկ լինել, այլև Մխիթար Գոշի հիշատակած Կաթողիկոսաց քար ամրոցի տեղորոշումով Հոռեկայ վանքի մերձակայքում: Բ. Ուլուքաբլանի ենթադրություններ, Կաթողիկոսաց քարը «այժմ Կաթողիկոսասար կոչվող վայրն է Թարթառի ափին, Մարտակերտի շրջանի Լյուլասազ գյուղի մոտ»²⁸: Ընդհանուր առմամբ միանգամայն ճիշտ համարելով առաջարկվող նույնացումը, կարծում ենք բուն ամրոցը կարելի է տեղորոշել այդ տեղանքում գտնվող այն քարայրի վայրում, որը, ըստ Մակար Բարխուդարյանի, կրում է «Կթղուկոսաբան» անունը²⁹: Այսպիսով, նաև այս տեղանունների ակներև կապի հավաստումը վստահություն է ներշնչում ենթադրելու, որ Հերդ գավառը ԺԲ—ԺԵ դարերում ընդգրկում էր հետագայի Զրաբերդի և Գյուլիստանի (Թալիշի) մեկիջրությունների սահմանային գոտին, արևելքում տարածվելով մինչև Թարթառ (Տրտու) գետի ստորին հովիտը ու ներառելով նաև Պարտավ քաղաքը: Այն տպավորությունն է ստացվում, որ, չնայած Զրաբերդի ու Հերդ (Հերքան) բերդի մերձավորությունը, այդ երկու ամրոցները տարբեր գավառների կենտրոններ էին և նրանց հիմնական տարածքները սահմանակցվելով Թարթառի միջին հովտում՝ ծավալվում էին հակադիր ուղղություններով: Ցավոք, առկա աղբյուրների հիման վրա, հատկապես քաղաքական հարափոփոխ իրադրությունը նկատի ունենալով, Հերդ գավառի և Հերդ (Հերքան) բերդի առավել ճշգրիտ տեղորոշում դժվար է առաջարկել:

Ուշագրավ է նաև Հերդ գավառի ու Հերք (Հերքան) բերդի պատմական ձևատառերի հարցը ԺԲ—ԺԳ դարերում: «Աղվանից ժամանակագրությունից» երևում է, որ ԺԲ դարի 40-ական թթ. Հերքան-բերդը պատկանում էր ժամանակի թուրքմեն իշխանավորներից Աղադին (Իզ ադ-Դիհն), որն ամուսնացել էր Գանձակի կառավարիչ Ռավադիի քրոջ հետ: Բերդը և հարակից տարածքը, հավանաբար, շարունակում էր մնալ օտարների տիրապետության ներքո մինչև ԺԳ դարի երկրորդ տասնամյակը, երբ թյուրքերից Սյունիքի, Ուտիքի, Արցախի ազատագրումը նոր թափ ստացավ: Ցավոք, հենց այս տարածքների ազատագրման ժամանակագրությունն ամենից ավելի թերին ու պակասավորն է, ուստի դժվար է ասել, երբ էին մաքրել թշնամուց Հերք (Հերքան) բերդն ու շրջակա տարածքը Զաքարյանները, որի մասին պատմում է Ստեփանոս Օրբելյանը: Ճիշտ է, «ի ձեռս մեր» տրված տարածքների թվում Իվանե աթաբեկը Հաղարծնի արձանագրությունում, գրված Զաքարե ամիրսպասալարի մահվանից (1112 թ.) քիչ անց³⁰, հիշատակում է և Պարտավը, սակայն այդ վիճադիր հուշարձանում հիշվում են նաև քաղաքներ, որոնք

²⁵ Նույն տեղում, էջ 228—229:

²⁶ Բաֆֆի, երկերի ժողովածու, հ. 10, եր., 1964, էջ 163:

²⁷ Հերքան-Հերդ-Հիւրեկայ-Հոռեկայ անցումները հնարավոր կլինի պարզարանել, թերևս, բարբառային նյութերի հիման վրա:

²⁸ Տե՛ս Բ. Ուլուքաբլան, նշվ. աշխ., էջ 116:

²⁹ Տե՛ս Մ. Բախտուրյան, նշվ. աշխ., էջ 225: Թվում է, որ բերդանվան մեջ «քար» բաղադրիչի առկայությունը ցույց է տալիս, որ ամրոցը կառուցվել էր քարայրի շրջակայքում կամ քարայրը ևս մտնում էր պաշտպանական համալիրի մեջ: Հատկանշական է, որ Կիրակոս Գանձակեցին աղվանից կաթողիկոսների ժամանակավոր կայանը անվանում է «քարայր», իսկ մի քանի էջ հետո՝ «քար» (Կիրակոս Գանձակեցի, էջ 178, 182): Հետաքրքրական է նաև, որ ան-Նասավին ևս նկարագրում է բերդ, որը իրենից ներկայացրել է բարձր ժալոի մեջ գտնվող քարայր, այդտեղ գտնվող աղբյուրով ու ջրաղացով, տե՛ս ձՆ-Насави, նշվ. աշխ., էջ 274—275:

³⁰ «Դիվան հայ վիճադրության», էջ 24: